

# 1 Pita

## Pita Ye Kerek Mimo

### Kerek Kee Komo Dowad Wongkoon

Pitambed kerek kee Rom aombed wongkoon. Wongkoon ye weeb yaa kuu Saesaa Nerombed kuristendan yemoon yenbandoone dukniwen. Anam andiwendan yaa kuu durud konde yenbandi yemoon meneboon kowe, Pita ye dowaken kuu yi anam andi aromne kangdommo doberembirime ande wongkoon. Ye kuu Yuudan anam andiwen yaamomban anam andiwendan korem yaa wongkoon. Wongkoon ye weeb kuu AD 64 areb.

### Korok Weng

1. Amun Kerundi Weng Ibduruk (1:1-2)
  2. Nub Bobni Yaa Burudande Bindi Ye God Yaningko Kankooni Ye Weng (1:3-12)
  3. Karadmo Dobirime Ande Ongkandi Ye Weng (1:13–5:11)
  4. Kerek Keye Kerekmen Dowad (5:12)
  5. Yeenbon Kubendi Weng (5:13-14)
- 

**1** <sup>1</sup>Ne kuu Pita, Yesu Keresumbed kinoona ye apaso keraan. Godbed kinoondan, okad yiri kuu yiwambibkin anambandan, buyokbayok keroone ambibkin Pontusiiwa, Galasiayiiwa, Kapadosiayiiwa, Esiayiiwa, Bitiniayiiwa aom doriib, yiiib yaa kerek kee keendaan. <sup>2</sup>Yiib kuu kurin kurin kuu Ambe Godbed meenmendekoreked kinoon. Kukuu ye Kingkinbed karadmo ongmeni yaambad Yesu Keresu ye weng wengambere awini ye dowadiib ye umkanbed yiiib niindem aom arendi ye dowadiib kinoon.

God ye kabamoon kondoon ye mimyob dowakeniib yewenubmo dobiriyiib yiiib yaa bangkandoka yiminmo kerok.

### Nub Dowad Godbed Bindoon Ye Kerekmen

<sup>3</sup>Nub korem nub Yariman Yesu Keresu yambe God yaningko kankoonem! Godbed mimyob miin darewoob keende nub kakman aroon

kumbed, Yesu Keresu bobnoon yiri ika demboon yaambéd wadkeri yeeb kondoone, ika woonenub anam kwananeen ande meedmi anammoyiib doruub. <sup>4</sup>Kwane, ika woonuwen yaambéd monmarindeban deendindeban korob kerindeban ye weng kunduk kanduwen. Kukuu yiib dowad Ewen ari kowoon. <sup>5</sup>Kwane, yiib yaa dabab menebaneen kuu yiib anam andi yaambéd God yaromkonombéd dorondare oonendaneene kwane wene aron yeenbon arimbed Godbed bindaneen ye kerekmen kuu dian keraneen. <sup>6</sup>Kuye dowad yiib kuu kubi darewoob keriwén. Aron dukmen kuu kiwaan yemoon yaambéd yiib yaa dabab meneboone yuudi areb keriwén kunéd, God ye weng kunduk kuyaa kubiyiib keriwén. <sup>7</sup>Kwane meneboon kuu yiib anam andi kuu anam ande korokbi ye dowad. Kwane anam ande awinaniib kuu Yesu Keresu dian keraneen yaron arimbed aningko kankooniyiib nambiriyiib aningko darewoob ariyiib Godbed bangkandaneen. Kedi, yiib anam andi kuu amotbed dene karadmo keroon ye bot gold burudandoon, amborom kuu aron yeenbon arimbed Godbed gold kuu monmaraneen kowe. <sup>8</sup>Yiib indowiib Yesu yaa wedmenindo kunéd, mimyob dowaken keenimaib. Kibireb wedmenokban doriib kunéd, ye yaa anam andiwe dakme id korokbinban ye kubi darewoob nambiriyiib yiib niindem aom demboon, <sup>9</sup>amborom kuu yiib anam andiwen kumbed Godbed bindi ye yumbon kondoon kowe.

<sup>10</sup>Godbed bindi keye dowad profesidan kuu God ye kabamoon kondoon ye mimyob dowaken yiib yaa mananeen ye weng unyemanbed dakmiwen kumbed, yi kuu God Ye Weng yaambéd kimingkanmo wene korobe onmiwen kuu, <sup>11</sup>Keresu ye Kingkin kuu korokbeena Keresu kuu durud yewéd kandene yoman nambiriyiib keraneen kuu komo aron arimbed komarewa kere kwananeen kuu kaadkerandamiib. <sup>12</sup>Korokboona wedmiwen kuu yika yi dowad deme kee awinindo, yiib dowad awiniwen. Unyemanbed komo dakmiwen kuu, Ewen arimbed kowoona monoon ye Kingkin Karadmo yaambéd Yesu ye weng amun dakmidanbed yiib yaa kwane daandiwen. God ye kabamoon kondoon ye mimyob dowaken yiib yaa komarewa mananeen ye weng kee engyu kangkon kaadkerandamiib kii.

### Karadmo Dobirime

<sup>13</sup>Kwani kowe, yiib inamen kuu God ye deme awini dowad nekwane dobirime. Yiibmeren kangkadmime. Yiib yaa God ye amun kerundi Yesu Keresu dian keraneen yaron arimbed kondaneen kuyaa kuu, ongme meedmime. <sup>14</sup>Arian yi weng wengambiri dana areb, yiib kuu anak God yiibkaadbanbed dohiriwen ye inamen arewa kuye yoman ika wanaib. <sup>15</sup>Yiib yaa baandoon ye God kuu karadmo kowe, ye areb kerenib komo komo kamandamiib korem kuu karadmo ye inamen yaambéd ambangkime, <sup>16</sup>amborom kuu God Ye Weng aombéd wongkoon kuu “Karadmo dobirime, amborom kuu Ne kuu karadmo kowe.” andoon.

<sup>17</sup>Yiib kuu kumun mimo yaambed nimakarub korem wengyundi ye God yaa kurikuri kerimaib kuu Ambe andimaib kowe, okad yiri doriib yaron kuu okad yiri kuu nub ambibkin anamban ande kwane doberenib uniyiib God yaningko kankoonimamime. <sup>18</sup>Kedi, yiibkaad kuu yiib kuu yiib awoya yi inameniibban ye dobiri yaambed bidoon kuu od gold o od silvaa areb monmaraneen ye barangbedban, <sup>19</sup>Keresu ye umkanbed bidoon. Ye umkan kuu barang darewoob yeman. Ye kuu arewayiibban demkoronmo ye sibi mana areb kere Burudandoon ye orok yaron arimbed nub dowad ayiwe bobnoon kui. <sup>20</sup>Ye kuu okadiib kumkam koremiib ongmenaboon yaron anuk yirimbed Godbed kinoona, yeenbon yaron kemaom yiib dowad angkadere dian keroon. <sup>21</sup>Yesu yaambed yiib kuu God yaa anam andiwen. Godbed ye nen demboone wadkeroone nambiriyiib konoon. Kwani kowe, yiib anam andiyiib anam id keraneen ande meedmiyiib kuu God yaambed kii.

<sup>22</sup>Yiib kuu anam anam wengambere awiniwen kumbed yiib niindem aom karadmo kerenib, aadidmiyiibban ye mimyob dowaken yiiwangkodmia yaa keendimaib kowe, mimyob dowaken darewoob kere anammo keendime. <sup>23</sup>Kedi, yiib kuu ika wooniwen, kumban duknimaibdan yaambedban, bobnindeban ye God yaambed ika wooniwen. Kuku wadkeriyiib dowan kerindeban ye weng Godbed yedme kowoon yaambed kii. <sup>24</sup>Kedi, God Ye Weng aombed wongkoon kuu,

“Nimakarub korem kuu kereek areb,  
yi yirin kami kuu at wuung nong wuung areb,  
kereek nuubnaiwe wuung kirobimaib,

<sup>25</sup> kumban Yariman ye weng kuu aron korem angkimbaraneen.”  
andoon.

Weng kee yiib yaa daandiwen kui.

### Yesu Ye Weng Kuu Ambodiib Kowe Awinime

**2** <sup>1</sup>Kwani kowe, maa yaa norin wandemberembiriyiib dudanabiyiib aadidmiyiib wungkandiyiib wengamborokbanabiyiib kuu korem yidme arime. <sup>2</sup>Dana monob yeeb woonuune muk yaa moom bobne anemoon areb, Yesu ye weng amun ye muk karadmo yaa meeni darewoob kerime. Kwane ananiib kuu Godbed bobni yaa burudande bindoon ye meeni kangdom yaa kaine amnaniib, <sup>3</sup>amborom kuu Yariman ye amun amun kami ye kiwaan kuu yiib wedmiwen kowe.

### Yesu Kuu Wad Doreen Ye Bot

<sup>4</sup>Ye kuu Wad Doreen ye Bot. Nimakarub ye yaa wunekariwen kumban, Godbed ye yaa kinene bobne komboroon. Kwane, yiib kuu ye yaa meniib kuu <sup>5</sup>yiib kangkon wad doreen ye bot areb keriiwe, Godbed bene

kingkin kerekmen ye ambib yenbeena God dore nimakarub dore wedyiri dobiridan karadmo keriiib. Kowe, Yesu Keresu yaambéd yiiib kuu God yaa munob koni yeman bangkandimaib areb yiiibka ye yaa kingkin kerekmen yaambéd konimaiwe, yembéd kuboon. <sup>6</sup>Kedi, God Ye Weng Karadmo aombéd yedmoon kuu,

“Kedi, nembéd Saiyon ye siti aombéd ambib kumundin amun yenbi ye dongka bot kowaan,  
kukuu nembéd kinaan ye bot, bobne kombaraan ye bot kui.  
Kowe, kanembéd ye yaa anam andaneen kuu,  
karak kandaanban.” andoon.

<sup>7</sup>Kwane, yiiib anam andiwendan kuu bot keyaa bobne kubudiriwen. Kumban anam andindodan kuyi dowad God Ye Weng aombéd kwamune yedmoon,

“Bot kuu boyambib yenbidanbed kankorariwen kuu,  
ambib kumundin amun yenbi ye dongka bot keroon.” andoon.

<sup>8</sup>Kwane angkon ye dowad God Ye Weng aombéd yedmoon kuu,  
“Ye kuu boyareb, nimakarub boknande komborok andi yeman,  
ye kuu dumnad areb, nimakarub boknande kombiri yeman.”  
andoon.

Yi kuu God ye weng yaa wengamberedandiwen kowe, boknande komborok andiwen. Kuye dowad yi kuu kinoon.

<sup>9</sup>Kumban, yiiib kuu Godbed kinoondan, Korok Darewoob ye dore nimakarub dore wedyiri dobiridan, karadmo kamidan, God ye karuwa nimaya kui. Kwane keriiwen kuu kumun yiri doriiba baande bene ye nambiri amun kai aom wooroon ye God yaa kubi wengiib yaningko kankoonime anded. <sup>10</sup>Anuk kuu yiiib kuu God ye nimaya karuwamban, kuned kibikee ye nimaya karuwa keriiwen. Anuk kuu yiiib kuu God ye mimyob keende kakman are nonondandi kandindo, kuned kibikee yiiib kuu kwamune kandiwen.

### **Amun Amun Dobiri Ye Kerekmen**

<sup>11</sup>Nangkodmia, okad yiri kuu yiwambibkin anamban, okad yiridan yaa yiiib kuu noroddan kowe, yiiib yaa ongakande yedmaan kuu yiiib id ye inamen kamaib. Inamen kee yiiib kingkin yaa nangmene bon keroon.

<sup>12</sup>Yiiib kuu God yaa anam andindodan kuyaom doriib kuu miin amun dobirime. Kwananiib kuu yiiib yaa ambarakmidan andaniib kumban yiiib amun amun kami kuu wedmendekore Godbed mananeen yaron arimbed ye aningko kankoonaniib.

<sup>13</sup>Yariman ye dowad kuu yiiibka kankubune okaddan yi korok korok korem yi dabderem aom dobirime. King kuu korok korok korem yi korok kowe, ye yaayiiib <sup>14</sup>yembéd ambarakmidan yaa ukum kondenib amun kamidan yaa kube ongakandi ye aromkono kondoon ye korok korok

yaayib kwanime. <sup>15</sup> Amborom kuu God ye dowaken kuu yibbed amun kamaniib kumbed inameniibbandan yi ogood weng kebengkok anded kowe. <sup>16</sup> Godbed amarakmi yaa kuu yib be yeedere obon kerundoon kowe kwamune dobirime. Kumban kwamune doberenib aadidmiyibbed amarakmi dabokne dobaraib. God ye demedan kerime. <sup>17</sup> Nimakarub korem yi aningko kankoonenib, anam andiwendan yaa mimyob dowaken keendenib, God yaa unenib, king yaningko kankoonime.

<sup>18</sup> Demedan, yib kuu yib korok korok yi dabderem aom doberenib yi aningko kankooni ye inamenmo awinime. Yib yaa nangkemmo amun amun kami ye korok korok yaamomban, kamkonomo kami ye korok korok yaa kangkon kwanime. <sup>19</sup> Amborom kuu kane yaa idiibban durud yewed bangkandaneene God ye dowad iwari kere kangdommo doberembaraneen kuu amun kowe. <sup>20</sup> Kumban yib kuu amarakmaniwe wurudbed yewed kondaneene iwari kere kangdommo doberembaraniib kuu, Godbed kakman Ewen arimbed kowaneen dee? Dowan! Kumban yib kuu amun amun kamaniwe yewed kondaneene iwari kere kangdommo doberembaraniib kuu Godbed yib yaa kubendaneen.

### Yesu Ye Yoman Winime

<sup>21</sup> Kuye dowadbed God kuu yib yaa baande kinoon, amborom kuu Yesu Keresu yib dowad durud yewed kandoon kowe. Kuku yib wedme kwanime ande korokbendekore ye areb kere ye yoman winime anded.

<sup>22</sup> Ye kuu ma amarakmindo,  
ye mongkodkonombed dudanabi wengyib ma yedmoona  
wengambirindo.

<sup>23</sup> Ye yaa nongdomatom ande yedmiwen kuu ye kuu neman kwamune inandindo. Ye yaa durud yewed koniwen kuu yib yaniin andi ye weng inandindo. Ye inamen maa keroon kuu yorokmo wengyundi ye God ye dingki ari yeka kan konoon.

<sup>24</sup> Ye kuu yekareb nub amarakmi korem kuu ye id arimbed at ming ari karine bobnoon. Kuku nub kuu amarakmi yaa bobnemoon areb kerubko yorokmo dobirime andi ye dowad kwanoon. Kedi, ye id yaa anbandiwen kumbed yib kuu wadkeri kandiwen. <sup>25</sup> Amborom kuu anak kuu yib kuu sibi areb awerendobenamo yarebimaib, kumban kibikee yib kuu yib kingkin Dorondari Ye Karub, Sibi Ooni Ye Karub, Yesu kui, ye yaa ika miniwen.

### Amered Yoom Korobe Dobirime

**3** <sup>1-2</sup> Kwani areb kuu nima yib kwangkong yibka kankubune yib amered yi dabderem aom dobirime. Yib amered kuu Yesu ye weng yaa anam andindo kumbed yibbed inamen kee kamaniib kuu, yib wengbedban, yib dohiri amuniib yib inamen karadmoyiib

God yaningko kankooni ye inameniib wedmekoriwa yena kuu God yaa anam andaniib. <sup>3</sup>Yiib kerengkandimbon kuu kad angka inwari yaambad keraib, awung bedmenabe inwariyiib gold ye itoowiib ebkad amuniib kwane awenembed kerengkandi dowad inwaraib kui. <sup>4</sup>Inamen mamaa kere yiib kerengkandimbon kuu yiib niindem aombad inamen iwariyiib nangkemiib keraniib kuu Godbed yiib yaa kubi darewoob keraneen. Inamen kee koyu yi kerengkandimbon arebban, kiomne arewa keraanban. <sup>5</sup>Kedi, Godbed oonendimaan andiwen ye nima karadmo kurin anukbed dohiriwen kuu kwamunemo kamiwen. Inamen kee awiniwen kumbad kerengkandimbon keruwen. Yi kuu yi amered yi dabderem aom dohiriwen. <sup>6</sup>Yi kuu Serambad Abraham ye weng wengamberenu ye yaa ne korok andimaun areb keruwen. Yiib kuu inamen yorokmo kamenib uniyiibban dobaraniib kuu yu meed keraniib.

<sup>7</sup>Karub yiib kwangkong yiib amered yaa awandi ye meeniyiibbed dohirime. Yi aromkono kuu karub yi aromkono arebban, darewoobban kowe. Angkong yi kuu yiib yoom kabamoon kondoon ye wadkeri kandaniib kowe, yi aningko kankoon awandime. Kwananiib kuu yiib kurikuri God yaa daani ye kiwaan kebenaanban.

#### **Arewa Meneboon Yaa Neman Kwamune Inandaib**

<sup>8</sup>Weng yeenbon kuu, yiib korem kuu inamen mimo meeni mimo kerenib ambanga oniya yaa mimiyoob dowaken keendimaib areb kerenib, dabab meneboondan yaa mimiyoob keendenib yiibkareb kankubunime. <sup>9</sup>Karub kanembed yiib yaa arewa kamaneeen kuu neman kwamune inandaib. Angkong yiib yaa nongdomatom ande yedmaneeen kuu neman kwamune inandaib. Yiib yaa kwamune kamoka ye yaa neman God yaningko yaambad amun kerunime, amborom kuu Godbed yiib yaa kwamune kamime ande kinoon kowe. Yiib kwananiib kuu yiib yaa God yaningko yaambad amun kerundaneen. <sup>10</sup>Kedi, God Ye Weng aombad yedmoon kuu,

“Kane kanembed kubembirimame amunmo dobarandamiib kuu, weng arewayiib dudanabi wengiib kuu deerewande korondime.

<sup>11</sup>Arewa yaa koronde amonombe amunmo kamenib, yewenubmo dohiri ye kiwaan onme wedme kwari dohirime.

<sup>12</sup>Amborom kuu Yariman kuu yorokmodan keendombere oonene, yi kurikuri yaa korobe wengambirimaan kowe.

Kumban Yariman kuu arewa kamidan yaa manmo keroon.” andoon.

<sup>13</sup>Ma, amun amun kami kuu yiib dowaken darewoob keraniib kuu karub maa yiib yaa yenbandaneen dee? <sup>14</sup>Kumban yiib kuu kwamune inamen yorokmo kamaniwe yenbandaneene durud yewed kandaniib kuu Godbed amun kerundaneen. God Ye Weng aombad yedmoon kuu, “Yi komo komo yaa unimaib kuu yiib kuyaa unaib, binangke unembaraib.” andoon.

<sup>15</sup>Ma, yiiib inamen aombed Yesu Keresu yembedmo kuu nub Yariman andime. Yiiib kuu Yesu yaa anam ande meedme doriib yaa karub kanembed kaamondi ye dowad kuu nekwe doberembirime. Kuned yiiib inandi kuu emayiiib kaamonoonman ye aningko kankooniyiiib <sup>16</sup>ambarakmiyiiibban ye inameniib kwane kerok. Kwane inandaniib kuu kane kanembed yiiib amun amun kami Yesu ye dowad awinimaib yaa inamen arewa ande yedmaniib kuu, yi weng arewa yaa karak bobnaniib. <sup>17</sup>God ye dowaken keroka, yiiib kuu amun amun kamiwe yenbandaniib, kedi, amun amun kamiwe yenbandiwa durud yewed kandi kuu amun, arewa kamiwed yenbandiwed durud yewed kandi arebban.

<sup>18</sup>Kedi, nimakarub yi amarakmi korem ye dowad kuu Keresumbed mimo bobnoon, yorokmomanbed yorokmobandan yi dowad bobnoon kui. Ye bobnoon kuu God yaa yiiib be mananded. Ye id ayiiwa bobnoon kumban, ye kingkin yaa kuu wadkeri konoon. <sup>19</sup>Kwane, ye kingkinbed wenene dukniwendan yi kingkin wii aom doriib yaa ye weng daandoon. <sup>20</sup>Yi kuu kurin kurinbed Noambed motod yengboon yaron yi dowad God kuu yodbiriban iwari meedmo doreen kumban, God yaa wengamberedandiwen. Motod aomniwendan kuu yemoonban, kaning kaningiiibmo kuu okbed yukne yeen yaa burudande bindoon. <sup>21</sup>Ok kee Godbed yiiib bindi ye baptais kerundi ye kumun korokboon. Kuku yiiib kad angka koroom okambi ye dowadban, God ye dowaken yaambad dobaraniin andi ye inamen ye dowad kui. Kuku Yesu Keresu bobnoon yiri ika nen demboon yaambad Godbed bindoon. <sup>22</sup>Ye demboon kumbed Ewen ari daanekore God ye dingki wiwi angkambad doroon, engyusiwa kane kane korok keriwendaniwa kane kane aromkono keriwendaniwa yi kuu ye dabderem aom doriib.

### Yesu Ye Inamenmo Awinime

**4** <sup>1</sup>Kwane, Keresu kuu ye id kuu durud yewed kandoon. Kwani kowe, yiiib kwangkong ye inamen areb kere aromnime, amborom kuu kane kuu ye id durud yewed kandoon kuu amarakmi yaa kuu korondo kowe, <sup>2</sup>kwamune kandoon yaronbed nare ari kuu, ye kuu ye id ye inamen yaambad dobaraanban, God ye dowaken yaambad dobaraneen. <sup>3</sup>Kedi, God yikaadbandan yi dowaken yaambad dobiriwed areb yiiib kuu anak kwamunemo dobiriiwe aron yiminmo kereen. Kowe, keye inamen kee, id ye dowaken kamiyiwa nenem kami ye moomiiwa ok arewa yemoon anembiriyiiwa disko andenabiyiiwa dudi god yaa bumangke kurikuri keri ye inamen miin arewayiiwa kamembirimaib kui. <sup>4</sup>Kwanimaibdan wedmiwen kuu yiiibbed yi yaa dabokne kamokban keriwed kowe, ke komarewa kii andenib yiiib yaa wengamborokbanabiwen. <sup>5</sup>Kumban yimbed komo dowad kwamenabiwen ye weng kuu wadkeridaniib dukniwendaniib yaa wengyundi dowad

nekwoon ye God yaa dakmaniib. <sup>6</sup>Kwanikob, dukniwendan yaa kwangkong Yesu ye weng amun daandoon kowe, yi kuu nimakarub korem areb yimbed wad dore ambarakmiwen kuu Godbed wengyundaneen kumban, Godbed doreen areb yi kuu kingkin ye kerekmen yaambad wad dobaraniib.

### **God Ye Deme Yaromkono Kuu Korobe Awinime**

<sup>7</sup>Kumkam korem yimin wandi yaron kuu dia kereen. Kwani kowe, korobe meenenib yiibka kangkadmime. Kwananiib kuu yiib kurikuri kuu yimin keraneen. <sup>8</sup>Inamen darewoob ari kee mimyob dowaken darewoob neman keenoon keenoon kamime, amborom kuu ambarakmi mimim yemooon kai kuu mimyob dowaken kumbed dabune kebenimaan kowe. <sup>9</sup>Mungkubmangkawiibban kumbed neman angkodmenoon angkodmenoon kamime.

<sup>10</sup>Yiib mimim yaa kuu Godbed ye deme awini ye inamen mimim kuu kabamoon bangkandoon. Kuuu Godbed kabamoon kondoon ye mimyob dowaken ye deme mimim kowe, yena yaa ambangkane awandi dowad korondiyiibban kwane ambangkime. <sup>11</sup>Kanembed God ye weng daandi ye deme awinoka, kaadkerok, Godbed daandimaan areb kerok. Kanembed awandi ye deme awinoka, Godbed yaromkono kondoon kumbed awandok. Kwananiib kuu komo kami korem kumbed Yesu Keresu yaambad God yaningko kankooni yeman. Ye yaa kuu nambiriyiib aromkonoyiib kerok, aron korem korem. Anam kwanok.

### **Kuristendan Kuu Durud Yewed Kandaniib**

<sup>12</sup>Nangkodmia, durud yewed ye dabab yiib yaa menebeen kuu yeka mamaa norod ye komboon menebeen manok ande meenenib binangkaib. <sup>13</sup>Kuned yiib kuu Keresu durud yewed kandoon ye dungkun kandiwen kowe kubime. Kwananiib kuu ye nambiriyiib dian keraneen yaron ari kuu kubi miin darewoob keraniib. <sup>14</sup>Yesu yaa kongeniwen kumbed yiib yaa weng arewambad damangkandaniib kuu Godbed yiib yaa amun kerundoon, amborom kuu God ye Kingkin nambiriyiib yiib yaa ibnendoon kowe.

<sup>15</sup>Yiib durud yewed kandi ye ambokab kuu kumka kumaniiwa yid biyiwa ambarakmi yenayyiwa o no wingkanambengkaniib kuyaambad kamaib. <sup>16</sup>Ma, yiib kuu kuristen keruwen ye dowad durud yewed kandaniib kuu karak bobnaib, Keresu yaningkoyiib yiiwaningko yaa ibmo daboknoon kowe God yaningko kankoonime. <sup>17</sup>Kedi, nimakarub yaa wengyundi yaron kuu muneen. God ye nimaya karuwa yidin yaa wengyundaneen kowe, God ye weng amun wengamberedandiwendan yaa komarewa wengyundaneen? <sup>18</sup>God Ye Weng aombad yedmoon,

“Yorokmodan bobni yaa burudande bindaneen kuu yobdood kowe,



Godiibbandaniib ambarakmidaniib kuu komo keraniib?” andoon.

<sup>19</sup>Kwanikob, God ye dowaken yaambad durud yewed kandiwendan kuu, ma korondiyiibban ye Ambengan God ye dingki ari yiybka konenib, amun amun kamembirime, korondaib.

### Ongki Weng Kurikuri Aamkono Aamkono Yaa

**5** <sup>1</sup>Keresu komarewa durud yewed kandene bobnoon kuu ne indowiib wedmeni, nambiri dian keraneen yaa daboknaneen ye karub kereni, nangkon kurikuri aamkono keraan kowe, yiyb kurikuri aamkono aamkono yaa ongakandi weng yedmandamaan kukei. <sup>2</sup>God ye nimaya karuwa yiybbed ooniibdan yaa sibi keendombere oonidan areb ongme keendombere oonime, yiyb yaa yenambad ande dedmoniyiibbedban, yiyb dowaken kerundimbed oonime. Kuku God ye dowaken yiyb yaa. Kuye deme ye kakmaniib kandi ye inamen kowe awinaib, awandi ye dowaken darewoob kumbed awinime. <sup>3</sup>Yiyb dingki ari kondoondan yaa dedmobende keanime kwanime kami ye korok keraib. Yiyb dohiri amuniib weng amuniib kumbed yi yaa inamen amun korokbendime. <sup>4</sup>Kwamaniib kuu Korok Korem Yi Yariman angkadaraneen yaron arimbed korob kerindeban ye kakman nambiriyiyb king ye korok ari dereni yeman areb kandaniib.

### Ongki Weng Kuristendan Korem Yaa

<sup>5</sup>Keweda koyuya, yiyb kangkon aamkono aamkono yi dabderem aom dohirime. Yiyb korem kuu yiybkanmo yaa kerengkaniibban kankubune yirimbed dohirime, amborom kuu God Ye Weng aombad yedmoon, “Godbed kerengkandan yaa manmo kerimaan, kumban yika kankubune yirimbed dohiridan yaa ye kabamoon kondoon ye mimyob dowaken kondimaan.” andoon.

<sup>6</sup>Kwani kowe, yiybka kankubunenib God ye dingki dabderem aom dohirime. Kwananiib kuu God ye dowaken keroon yaron arimbed benkoobaneen. <sup>7</sup>Ye kuu yiyb yaa dowakeniib kerene awandembirimaan kowe, dabab yaa meeni darewoob korem kuu ye dingki ari nongkobime.

<sup>8</sup>Yiybkareb kangkadme keenombirime. Yiyb bonman, Seten kuu laiyon arud kabang kameen kumbed nimakarub anandameen areb yarebeen. <sup>9</sup>Yiyb anam andi kangdommo doriib kumbed ye yaa manmo kerime, amborom kuu yiyb kuristen angkodmia okad yimin yimin yaa doriib kuu yiyb durud yewed kandiwen areb kwamune kandiwen kuu yiybkaadkeriwen kowe.

<sup>10</sup>Kabamoon kondoon ye mimyob dowaken korem ye God, Yesu yaambad dawan kerindeban ye nambiri dabokni dowad yiyb yaa baande kinoon ye God kui, yiyb durud yewed kandiwe kibikbed nare ari aron dukmen keraneen kuu yembad yiyb yaa demkoronmo ongmenne anam

andi kangdommoyiib aromkonoyiib kiringmindeban ye anam andiyiib kondaneen. <sup>11</sup>Ye yaa ooni ye aromkono aron korem korem kerok. Anam kwanok.

### **Kubendi Weng**

<sup>12</sup>Ma korondiyiibban ye kuristen angkodmi Sailas, kuu kwamunemo wedmnaan kui, ye kuu awawoonkob kerek dukmen kee yiib yaa wongkane keendaan. Yiib yaa kube ongkandeni weng keyaambed Godbed kabamoon kondoon ye mimyob dowaken anam kuu korokbendaan. Keyaa kangdommo kere dobirime. <sup>13</sup>Yiib ibmo kinoondan Babilon aom doriib kumbed kubendi weng yiib yaa keendiib kii. Ne dana Maak kangkon kwamune keendoon. <sup>14</sup>Yiibkanmo yaa mimyob dowakeniibbed kubenoon kubenoon kamime.

Keresu yaa ibmo dabokne doriibdan, yiib korem yaa yewenubmo dobiriyiib kerundok.